

歷代兵事

涿州風土記第五

涿州無高山大林阻漳滹沱之險燕趙用兵此爲必爭之地秦以前尙矣楚漢之際趙王歇有故趙地及韓信出井陘斬陳餘泚上用李左車之謀傳檄燕趙州所屬邑蓋皆傳檄而定未嘗被兵陳豨反趙趙相奏斬常山守尉高祖以爲力不足赦之遣樊噲灌嬰等擊豨噲降定清河常山二郡二十七縣嬰降定安平等七縣而豨平更始二年光武初起徇河北到薊王郎移檄購光武十萬戶薊中起兵應王郎光武南奔不敢入城邑舍食道傍天大寒烈官屬飢乏至饒陽蕪蕪亭馮異上豆粥明日光武謂諸將曰

記五

兵事

昨得公孫豆粥飢寒俱解公孫異字也抵饒陽郭下假爲王郎使者入傳舍傳吏進食從者爭奪之吏疑其僞乃椎鼓給言邯鄲將軍至光武升車欲馳已而懼不免徐還坐曰請邯鄲將軍入久乃駕去邯鄲者王郎所據郡也是時郡縣爭應郎故假其使者乃得食既去至南宮南宮者饒陽南亭也近滹沱光武至亭遇風雨引車入道傍空舍馮異抱薪鄧禹爇火對竈燎衣異進麥飯菟肩其後建武六年異入朝光武詔異曰倉卒無婁亭豆粥滹沱河麥飯厚意久不報謂此也至滹沱候吏白無船不可濟光武令王霸往視霸詭言冰合可渡比至水果合令霸護渡未畢數

騎而水解光武喜曰王霸權以濟事殆天瑞也進至下博城西惶惑不知所之有白衣老父在道旁指曰努力信都爲長安城守去此八十里光武即馳赴之是時郡國皆應王郎獨信都和戎二郡不從郎光武至信都太守任光和我太守邳彤以兵歸光武發傍縣得精兵四千人執復振和戎王莽所置郡分信都枝縣隸之治下曲陽是時州所屬縣未知何縣隸信都何縣隸和戎要皆未降王郎所發四千人者此諸縣爲多明年光武擊降堂陽貫縣昌城下曲陽中山盧奴而州境獨不被兵其秋光武擊銅馬于鄆建武初祭遵討彭寵蓋嘗駐軍下博壁于衡漳傍而史失

記五

兵事

二

之北周時即祭遵壘爲下博縣治云建武十三年遣捕虜將軍馬武屯滹沱河以備匈奴於是州境始有邊患漢靈帝時寇盜四起而博陵人張牛角自号將兵從事與常山褚飛燕合飛燕推牛角爲帥牛角攻瘦陶中流矢且死令其衆奉飛燕飛燕遂改姓張從牛角姓也号曰黑山黑山賊之起由牛角始是時烏桓乘天下亂畧有漢人十萬餘戶袁紹皆立其酋豪爲單于遼西烏桓蹋頓尤彊爲紹所厚曹操破袁氏紹子尙熙歸蹋頓蹋頓欲助尙復故地建安十一年操鑿平虜泉州二渠以通糧而征蹋頓滅之其平虜渠自饒陽鑿滹沱因饒河故瀆決令北注新溝以入

派水其後司馬懿征公孫淵亦由此渠運糧而築城其口所謂魯口城也自漢魏以來新主削平則有高光曹馬僭亂割據則有趙歇王袁外國侵軼則有匈奴烏桓流寇草竊則有銅馬黑山自是之後州境屢更兵革大氏不外此四端而被兵有淺有深其淺也一良有司防禦綏輯而百姓安堵其深也則攻守相持田野化爲戰場義烈併命夫婦橫死其強弱勝敗之數故由將帥人材智之不同而措注控制之得失禍福立效往往一計之失而危亡已隨其後土地人民不能復有嗟乎謀之不臧受禍至酷豈不痛哉溪州自元明以來近在畿甸兵禍差少晉唐宋金皆國

記五

兵事

三

家不能有而奔以與人而晉唐連兵特久五胡之世攻戰尤亟晉懷帝永嘉三年石勒進軍常山分陷中山博陵諸縣爲王浚所敗退已而進寇信都殺冀州刺史王斌尙不能有其地及永嘉六年七月進據襄國是月劉琨猶自晉陽東出收兵于中山常山其冬勒攻信都殺刺史王象而王浚復以邵舉行冀州刺史保信都則州境猶未陷于勒既滅王浚破劉琨乃以武遂令李回爲易北督護兼高陽太守撫輯幽冀流民封回爲弋陽子自是州境悉非晉有矣穆帝永和六年冉閔既滅石氏燕慕容雋遣慕容霸等南侵石勒故所署征東將軍鄧恒與幽州刺史王午走保

魯口是時范陽太守李產降燕其子績爲幽州別駕從王
午在魯口鄧恒欲殺之午曰世方喪亂而績捐家立義若
以猜嫌害之燕趙之士謂我直相聚爲賊了無意識此爲
坐自屠潰也乃遣績歸燕自是魯口人有固志慕容雋自
將擊之軍至清梁恒將鹿勃早夜襲燕營雋自出營外屯
高冢上慕容與根率精勇數百人擊之追奔四十里早僅以
身免清梁在蠡吾南行四十里則及饒陽矣然燕亦以魯
口軍銳不敢逼攻明年雋遣慕容評攻王午於魯口評至
南安午遣將鄭生拒戰評擊斬之又明年冉閔敗死閔子
操奔魯口時鄧恒已死王午聞冉閔敗死自稱安國王慕

記五

兵事

四

容雋遣慕容恪封奕陽驚等攻之午閉城自守送冉操詣
燕軍慕容恪知魯口未可攻不欲頓兵堅城乃掠其禾稼
而退屯安平積糧治攻具將復攻王午會中山蘇林起兵
稱帝於無極恪移軍攻斬之而王午爲其將秦興所殺呂
護殺興復自稱安國王當是時燕趙之間魯口最爲重鎮永
和九年燕元璽之二年也慕容恪擊呂護於魯口元璽三
年圍魯口三月拔之呂護奔野王慕容垂之起也丁零段
遼據魯口慕容農自信都西擊破之遼單騎奔中山頃之
燕建節將軍餘巖叛燕自武邑北趣幽州而秦中山太守
王充固守博陵爲秦拒燕慕容麟攻充於博陵城中糧竭

矢盡功曹張猗踰城出聚眾以應麟充臨城數之曰卿是秦民吾爲卿君卿母在城卿乃起兵應賊弃君親不顧不謂中州禮樂之邦乃有卿等麟拔博陵執充及苻鑑殺之充新都氏也蓋自慕容暉之亡州境盡爲秦有及是復入於燕其明年爲後燕建興元年慕容麟自中山討鮮于乞垂如魯口其明年燕主垂自魯口如河間勃海又四年燕主垂大舉擊魏遣征東將軍平規發兵冀州規以博陵武邑長樂三郡兵反於魯口垂自將擊規至魯口規弃眾將妻子及平喜等數十人走渡河垂引兵還已而垂卒規收

記五

兵事

五

合餘黨據高唐慕容隆擊斬之是年冬魏主拓跋珪擊燕拔常山自常山以東守宰或走或降諸郡縣皆附於魏魏主珪軍於魯口燕博陵太守申永奔河南博陵令屈遵降魏魏以遵爲中書令出納号令兼摠文誥燕慕容寶之永康二年魏皇始二年也寶使其左衛將軍慕輿騰攻博陵殺魏所置守宰魏主珪復軍魯口遣將襲取中山然後北歸其明年爲魏天興元年博陵盜起秦畧陽公元遵討平之其後百一十四年爲魏宣武帝永平四年冀州沙門瀆慶作亂以尼惠暉爲妻以勃海人李歸伯爲十住菩薩平魔軍司自号大乘能合狂藥令人服之父子兄弟不相識

唯以殺害爲事魏元遙破禽之愚哉大乘賊之稱亂也欲倚託妄邪術徼倖成事何其謬邪大乘賊起冀州其黨必擾及深屬而史不詳及孝明帝孝昌二年五原降戶鮮于脩禮等帥北鎮流民反於左城左城者胡三省以爲在博陵界也北道大都督楊津擊敗之既而長孫稚河間王元琰討之前至滹沱兩將不和而軍敗於五鹿脩禮旋爲其黨元洪業所殺葛榮復殺洪業而自立擁眾北趣瀛州魏廣陽忠武王元深自交津引兵躡之交津者在武彊所謂交津橋隋時劉智海家焉而劉焯劉炫從寓者也胡三省謂之交漳口葛榮既擊殺元融於博野元深不敢追引軍

記五

兵事

六

趣定州刺史楊津攻深深與左右間行至博陵界逢葛榮遂遇害是後葛榮盡得冀定殷瀛等州有眾二十餘萬尋爲尔朱榮所滅尔朱榮既死尔朱兆令高歡統葛榮舊眾就食山東高歡於是得據冀州起兵於信都也自晉永嘉之亂四海分裂一方之主步玉屢更州於其時是不一姓初陷於石勒石氏亡入於冉閔其後再歸於慕容一歸於苻秦而卒定於元魏鮮于倡亂遂啓高齊其大畧也自葛榮擁眾自立後九十年而有竇建德劉黑闥之事建德初從高士達爲亂隋大業十二年楊義臣既破士達建德率百餘騎亡至饒陽乘其城無守備攻陷之撫循士眾收兵

得三千餘人自稱將軍自北齊移饒陽治魯口隋於此置
深州唐初因之於是饒陽爲燕趙重鎮建德既得饒陽執
遂盛先是羣盜得隋官及士族皆殺之建德獨善遇之由
是隋官多以城降義寧元年建德爲壇於樂壽自稱長樂
王置百官改元樂壽者隋志以爲古樂鄉縣也是時隋左
禦衛大將軍涿郡留守薛世雄軍次河間建德糧乏衆散
不滿千人在武彊縣境收麥充食聞世雄至惶懼無計遇
一女巫問欲走與降首孰吉巫言皆不吉問欲掩擊何如
巫曰今夜未明到大吉是時巳日加午去河間百四十里
建德選敢死士二百八十人先行餘勒續發約日夜到則

記五

兵事

七

打明即降耳未至一里許天欲明建德且降須臾大霧
咫尺不辨人建德喜曰天助我也遂突入世雄營世雄驚
潰建德執復震及聞煬帝被弑饒陽令宋正本說建德徇
定河北正本博學有才氣建德引爲謀主唐武德元年宗
城人獻彘圭於建德正本曰此天所以賜禹也遂改國号
曰夏而正本爲納言二年建德陷黎陽虜淮安王神通置
於下博待以客禮建德以鄱陽崔元遜爲深州刺史秦王
李世民既誅建德平河北而劉黑闥復反秦王以裴晞爲
深州刺史崔元遜聞黑闥起乃與其黨數千人謀於野伏
甲士於車以禾覆其上直入州聽事自禾中呼噪而出執

晞殺之而傳首於黑闥四年淮安王神通將關內兵至冀州與李藝兵合擊黑闥饒陽城南布陳十餘里黑闥衆少依隄單行而陳以待之會大風雪神通乘風擊之已而風返神通大敗李藝軍其西追奔數里聞神通敗退保藁城黑闥復破之五年黑闥爲秦王所破亡奔突厥旋引突厥內犯行軍摠管淮陽壯王道平將兵三萬與黑闥戰下博道平帥輕騎先犯陳令副將軍史萬寶將大軍繼進萬寶與道平不叶乃曰我奉手勅云淮陽小兒軍事皆委老夫今王輕脫妄進吾不可與俱靡不如以王餌賊堅陳以待之道平獨進無助遂爲黑闥所殺萬寶衆亦大潰道平數

記五

兵事

八

從秦王征伐死時年十九秦王傷之謂人曰道平常見吾深入賊陳心慕效之遂至於此爲之流涕道平既敗黑闥盡復故地已而太子建成敗之於館陶黑闥與數百騎亡比至饒陽從者財百餘人是時崔元遜爲僞涇州摠管將納黑闥據城拒守有張善護者先爲鄉長至軍中語少年曰捉黑闥富貴可立致也少年皆曰非諸葛車騎不可諸葛車騎者僞饒州刺史諸葛德威爲車騎領當城之兵者也善護知德威非得酒食不宥出師乃於家殺豚置酒延德威語之德威許諾黑闥至饒陽元遜請入城不許就市中遣鋪設坐食元遜請閱城兵許之比行德威領健卒前

導因就車上禽黑闥送建成軍前舉城降元遜與子野久
奔突厥黑闥遂平自晉失冀部石趙慕容燕苻秦皆鄰敵
交爭而葛榮竇建德劉黑闥則皆以盜賊起亂州境被兵
前後數百年及唐初黑闥平兵禍始息武后時孫萬榮以
營州契丹攻陷冀瀛二州而突厥默啜又陷定趙等州狄
仁傑爲河北道安撫大使河北遂安是時被兵未甚及天
寶十四載安祿山反河北二十四郡望風披靡自是終唐
之世深州無寧歲矣祿山既起兵使其黨徇河北郡縣饒
陽太守盧全誠據城不受代與河間司法李奐景城長史
李暉共推平原太守顏真卿爲盟主軍事皆稟焉盧全誠

記五

兵事

九

者包譜河洛春秋所云盧皓者也是時饒陽郡治陸澤陸
澤者析饒陽縣境所置邑也祿山使其將張獻誠將諸郡
團結兵萬人圍饒陽月餘不解當是時常山太守顏杲卿
與饒陽爲犄角杲卿真卿之從兄也以計禽賊將何千年
千年謂杲卿曰太守欲輸力王室應募烏合難用臨敵宜
且深溝高壘聲云王師二十萬自朔方入土門因使說張
獻誠云足下所將多團練之人無堅甲利兵山西勁卒至
不可當也獻誠聞必解圍遁去此亦一奇也杲卿從其言
獻誠果遁其團練兵皆潰杲卿使人入饒陽慰勞將士於
是河北響應歸朝廷者十七郡肅宗至德元載史思明等

陷常山諸郡復爲賊守唯盧全誠不從思明等圍饒陽李
奐將七千人李暉遣其子祀將八千人救之皆爲思明所
敗饒陽被圍二十九日會李光弼克常山思明乃解去光
弼之克常山也執安思義思義謂光弼曰思明在饒陽去
此不二百里昨暮羽書已去計其先鋒來晨必至大夫遠
來士馬疲敝未易當大敵不如移軍入城早爲備禦光弼
從之思明聞常山不守自饒陽率二萬騎先薄常山城下
光弼開城出戰或告賊步兵五千一晝夜行百七十里亦
自饒陽至光弼遣步騎四千掩擊破之思明始退光弼又
與郭子儀合軍連破賊於九門沙河嘉山於是河北十餘

記五

兵事

十

郡又殺賊守將反正西京旣陷李郭西援河北郡縣猶爲
唐守及思明陷河間景城李奐李暉皆死顏真卿亦奔郡
南走烏承恩以信都降賊河北皆爲賊有矣而饒陽猶固
守不下思明圍之彌年外救盡絕饒陽裨將張興者束鹿
人也力舉千鈞性明辨思明引衆傅城興擐甲陌刀重五
十斤一舉輒數人死會太守李系窘迫赴火死城遂陷思
明禽興至謂曰將軍壯士也能與我共富貴乎興曰天子
待祿山如父子今乃反丈夫不能殺賊乃北面事之乎思
明怒張於木上鋸殺之口不絕罵氣絕乃已胡三省論之
曰河北二十四郡惟張興可以言義士耳兩京旣復思明

以所部十三郡奉表請降饒陽其一也肅宗遣烏承恩與內侍李思敬共往宣慰承恩所至宣布詔旨深滄瀛安等州皆聽命河北率爲唐有思明死張忠志用常山裨將王武俊之言爲恒趙節度使思明死張忠志用常山裨將王武俊之言以恒趙深定易五州降於河東節度辛雲京時寶應元年也朝廷使仍統五州爲節度使号其軍曰成德軍賜姓名曰李寶臣寶臣以武俊之策爲善擢爲先鋒兵馬使武俊本契丹也初名没諾干自是河北藩鎮大率皆叛將矣史朝義之敗於洛陽而東奔也僕固瑒領蕃漢兵追擊連破之戰於下博城南賊大敗積尸擁流而下是年夏秋苦雨

記五

兵事

十一

陂湖流注其漳河及諸津渡舟船悉歸官軍賊四路俱絕田承嗣上疏於朝義畧曰部統之師皆自疲頓主客勢倍勞逸力殊驅而令戰未見其利請用車十五乘於古夏康王城北作車營三上設棚排倒戈爲禦每車甲士二人持兵而伏隨軍子女羅於帳中每營輜重分列其次營後選二萬人布偃月陳左右奇兵亦設此陳左者東南行右者西南行令各去車營十里營前選精卒爲雁行陳接戰不勝則退於偃月陳後前軍旣卻敵必至車營攻取珍玩俟其陳執已分然後桴鼓齊鳴鹵楯爭先左軍西行右軍東邁皆取古城之南令首尾相屬伏兵之發料敵必驚前後

既不相救中軍又遇精兵不敗何待朝義覽疏大悅從其計官軍挫敗喪師徒三千餘級僕固瑒退師數十里朝義得達莫州康王城今涿州村也時瑒父懷恩與都知兵馬使薛兼訓兵馬使郝庭玉田神功辛雲京會於下博進圍莫州朝義奔城敗死安史之禍至是始平然藩鎮擅命繼起涿州被兵益棘李寶臣既鎮成德軍欲以軍府傳其子惟岳爲惟岳年少諸老將不爲用於是誅涿州刺史張獻誠等至有十餘人同日死者惟岳繼襲求旌節朝廷不許遂與田悅李正己連兵拒命朝廷命朱滔張孝忠攻之拔東鹿進圍涿州惟岳將王武俊與惟岳有隙執惟岳殺之

記五

兵事

三

傳首京師涿州刺史楊榮國惟岳姊夫也降於朱滔滔使復其位德宗以康日知爲涿趙都團練觀察使初討惟岳朝命攻得惟岳城邑者即以予之朱滔得涿州至是令滔還幽鎮滔請涿州不許滔由是怨望留屯涿州君子曰朱滔討惟岳再戰再勝及瓜分成德巡屬以賞降將尺寸之地滔不與焉唐自是卒失河北此非所謂措注控馭之計一失而土地人民遂不能復有者乎王武俊亦自以手誅惟岳功在康日知上而不得涿州亦不悅是時王師方圍魏博田悅乃遣判官王侑許士則間道至涿州說朱滔曰司徒受詔討惟岳旬朔之間拔東鹿下涿州使惟岳授首

司徒之功也天子詔書令司徒得城邑皆隸本鎮今乃割
潑州以與日知信義可知矣司徒若有意援魏亦子孫萬
世之利也又使說武俊曰大夫誅首逆拔亂本康日知不
出趙州豈得與大夫同日論功朝議不以潑州見畀蓋以
大夫善戰恐爲後患耳今朱司徒不欲以潑州與日知願
以與大夫請早定刺史以守潑州三鎮連兵它日永無患
矣滔武俊皆然之武俊以其子王士真爲恒冀潑三州留
後遣判官王巨源使於滔即令知潑州事李納之反於鄆
也其都虞候李士真以德棣二州歸國求援於滔滔聲言
助李士真召之至潑州議軍事至則留之以潑州授王巨

記五

兵事

三

源自將步騎二萬五千南發至東鹿士卒誼噪曰天子令
司徒還鎮奈何南行牙官蔡雄諭之曰司徒初發范陽恩
旨令得惟岳州縣即有之司徒以幽州少絲纒故與汝曹
竭力血戰以取潑州冀得絲纒以寬汝曹賦率也國家無
信復以潑州與康日知今茲南行爲汝曹也汝曹不欲南
者任自歸北何喧悖爲詰朝復還潑州休息數日相與歸
鎮耳衆然後定滔即引軍還潑州斬唱率者二百餘人乃
復南發初武俊旣誅惟岳遣判官孟華入見及是上遣華
歸諭旨華諫武俊曰聖意於大夫甚厚康中丞不日移宅
鎮潑趙終以予大夫何苦自同逆亂乎武俊奪華職使歸

私第卒連兵救魏自是河北不用朝命爲故事矣蓋二千年以來深州兵禍或在鄰敵或起盜賊獨唐世割據於叛藩其前安史亂本在狃習燕安其後王氏竊據則患生於國論之乖失而其終遂不可復挽憲宗朝欲革河北世襲之弊遣左神策中尉吐突承璀討王承宗承宗武俊孫也元和五年幽州節度使劉濟自將兵七萬人擊承宗拔饒陽東鹿五月劉濟奏拔安平濟以其子總爲行營都知兵馬使使屯饒陽總因弑父兄自立元和十年再討承宗十一年正月劉總奏敗成德兵拔武彊斬首千餘級四月劉總奏破成德兵於深州斬首二千五百級是時方用兵准

記五

兵事

古

蔡討王承宗兵十餘萬歷二年無功劉總旣得武彊留屯不進月給度支錢十五萬縉朝士多請罷北討併力淮西上從之淮西平韓愈薦布衣柏耆往說承宗歸命河北諸鎮盡遵約束矣穆宗即位移田弘正成德於是王庭湊殺弘正自稱留後河北復亂深州刺史牛元翼成德良將也魏博節度使李愬使遺以劍曰昔吾先人以此劍平朱泚吾又以之平蔡州今以授公努力翦庭湊無怠元翼以徇于軍報曰願盡死愬李晟之子也詔以元翼爲深冀節度使尋以爲成德節度使是時朱克融作亂于幽州與庭湊合庭湊遣其將王立攻深州不克則引幽州兵圍之長慶

元年橫海節度使烏重胤奏敗成德兵于饒陽遂將全軍救深州重胤宿將知賊未可破按兵觀釁上怒以杜叔良爲深州諸道行營節度使代重胤叔良大敗以鳳翔節度使李光顏兼深州行營節度使代叔良穆宗之移田宏正用杜叔良是一事再失算也幾如是而土地不亾二年幽州兵陷弓高進圍下博是時深州西南皆逼於庭湊惟恃弓高以通橫海饋餉弓高旣陷糧道遂梗中書舍人白居易易上言自幽鎮逆命朝廷徵諸道兵十七八萬攻圍半年王師無功弓高旣陷糧道不通下博飢窮日亟請令李光顏將諸道勁兵約三四萬人從東道進開弓高糧路解深

記五

兵事

五

州重圍與元翼合執令裴度將太原全軍自西面壓境其餘不可用者悉罷歸本道止留東西二帥兵止六萬如此則衆齊令一必有成功疏奏不省頃之度支饋滄州糧車六百乘至下博盡爲成德軍所掠諸軍匱乏是時裴度以河東兵自西面李光顏以橫海諸軍自東面義成軍節度使陳楚以易定軍自北面環救深州皆以糧乏不能進軍士自采薪芻日給不過陳米一勺會有詔分魏博軍與李光顏使救深州魏博軍潰其帥田布自殺而深州圍益急於是詔雪庭湊而罷兵以兵部侍郎韓愈爲宣慰使以牛元翼爲山南東道節度使仍遣中使入深州督元翼赴鎮

庭湊雖得旌節不解溪州之圍韓愈旣行衆皆危之元稹奏曰韓愈可惜穆宗亦悔詔愈至境更觀事執無必于入愈曰安有受君命而滯留自顧者遂入庭湊嚴兵拔刃弦弓矢逆之及館甲士羅于庭就位旣坐庭湊曰所以紛紛者乃此曹所爲非庭湊心愈大聲曰天子以尙書有將帥材故賜之節鉞乃不能共健兒語耶甲士前曰先太師爲國打朱滔血衣猶在此軍何負朝廷乃以爲賊乎愈曰兒郎等且勿語聽愈言愈將爲兒郎等已不記先太師時事矣若猶省記乃大好且順逆之爲禍福豈遠邪自天寶來安祿山史思明李希烈梁崇義朱滔朱泚吳元濟李師道

記五

兵事

六

復有若子若孫在乎亦有居官者乎衆皆曰無又曰田令公以魏博歸朝官至中書令父子受旌節子孫雖在孩提者亦爲好官王承元以此軍歸朝廷年才十七亦杖節劉悟李祐今皆爲節度使汝曹耳所聞也衆乃曰田弘正刻此軍故軍不安愈曰然汝曹亦害田令公身殘其家矣復何道衆乃謹曰侍郎語是庭湊恐衆心動麾使散出謂愈曰侍郎來欲使庭湊何爲愈曰神策六軍之將如牛元翼比者不少但朝廷顧大體不可弃之耳尙書何爲久圍之庭湊曰即當出之愈曰若尔則無事矣庭湊因與愈宴禮而歸之愈歸盡奏與庭湊及軍士語穆宗悅曰卿直向伊

如此道大善之未幾牛元翼以十騎突圍出溪州大將臧平等舉城降庭湊責其久堅守殺平及將吏等八百餘人自李惟岳王承宗相繼拒命溪州皆爲賊守被兵皆不溪及庭湊之亂牛元翼力守孤城以與賊抗被圍旣久罷兵之後受禍尤烈自是朝廷再失河朔迄于唐亡不能復取而溪州百年以來皆歸王氏昭宗景福元年李克用攻王鎔李匡威救之二年匡威救鎮州還次下博聞其弟匡儔據軍府自立匡威與親近留溪州泊于陸澤進退無所之王鎔德匡威迎歸鎮州匡威謀劫鎔鎮人殺之匡儔乃出兵攻鎮之樂壽武彊以報匡威之恥王鎔者庭湊五世孫

記五

兵事

七

也梁太祖開平四年遣供奉官杜廷隱丁延徽以魏博兵三千分屯溪冀聲言助趙趙將石公立戍溪州欲杜關不納王鎔久臣于梁遽令公立移軍于外以納梁軍公立出溪州指城而泣曰朱氏滅唐三百年社稷三尺童子知其爲人我王期以長者此所謂開門揖盜也此州今爲俘虜矣未數日廷隱盡殺趙戍卒閉門拒守痛哉乎公立之言也國家之禍孰有大於開門揖盜者乎廷隱旣據溪州鎔始命公立攻之不克求援于晉晉王李存勗自將救之敗梁兵于柏鄉趙人憾廷隱等之殺趙戍卒也奮刃追北梁精兵幾盡杜廷隱等奔溪冀而去悉驅丁壯爲奴虜老弱

者阬之城存者壞垣而已是時王鎔已積弱不支晉方盛
疆爲梁勅敵乾化三年梁祖自將擊趙三月至下博南登
觀津塚趙將苻習引數百騎巡羅不知是梁祖也或告曰
晉兵大至帝奔行幄自下博亟趣六十餘里至棗強遂分
兵圍脩是時晉王李存勗征幽薊命李存審史建瑋李嗣
肱以三千騎屯趙州存審曰吾王方事北伐南方之事委
吾等三人老賊若得脩縣必西侵涿冀今兵少當以計破
之乃自引八百騎扼下博橋建瑋嗣肱分道禽生建瑋分
其麾下五百騎爲五隊約俱取梁芻牧以還會下博橋翌
日皆如約來會獲數百人皆殺之各留其一人斷臂逸去

記五

兵事

六

明日建瑋嗣肱各將三百騎效梁軍旗幟服色雜梁芻牧
中暮叩梁營殺守門者縱火大譟弓矢亂發左右馳突各
斬馘執俘而去梁營大擾亂而前芻牧被獲斷臂者適至
皆曰沙陀軍大至矣梁祖燒營夜遁旣而覘之曰晉軍實
未來乃史先鋒遊騎耳梁祖慙憤成疾也未帝即位楊師
厚攻鎮州掠近縣至下博劉守奇引兵會攻下博拔之龍
德元年張文禮弒王鎔軍校張友順帥衆至文禮第請爲
留後文禮以友順爲涿州刺史晉兵討文禮獲友順明年
克鎮州以趙仁貞爲涿州刺史王氏自庭湊至鎔傳五世
六人而滅始州在唐世被藩鎮兵禍最久自安史首亂迄

于王鎔之滅藩鎮之禍至是始息而晉王李克用與契丹
構怨其後外國之禍又興唐明宗天成三年幽州送所獲
番將六百餘人至京師明宗選其壯健置爲契丹直俄有
首領吉趙實自京遁至涿州捕獲斬之是時契丹尙未深
入及晉高祖獻十六州于契丹於是涿州始與遼界邊出
帝開運元年遼太宗之會同八年也契丹南侵不勝分兵
二道一出滄州一出涿州以歸其九月契丹攻遂城樂壽
涿州刺史康彥進擊卻之二年契丹圍鎮州分兵下鼓城
等九縣是時趙延壽爲契丹鄉導仍歲侵涿冀護聖都指
揮使杜漢徽戍涿州破契丹于樂壽斬獲甚衆三年契丹

記五

兵事

九

使其瀛州刺史劉延祚遺樂壽將軍王巒書請舉城內附
而涿州刺史慕容遷又獻瀛莫圖於是議北伐以杜重威
爲元帥至瀛州城門洞啓重威等不敢進而還契丹大舉
南侵趣恒州重威等至武彊張彥澤自恒州引兵會之說
重威沿滹沱水西援重威等遂降契丹晉與契丹開釁景
延廣爲之也釁啓而晉社遂墟此有國交鄰者之炯戒而
後之謀國者不忍區區之忿往往祖延廣之故智甘蹈石
晉之禍而不寤及其旣敗雖欲食延廣之肉豈有及乎悲
夫悲夫晉亾而涿州之邊禍未息漢隱帝乾祐二年遼世
宗天祿之三年也契丹入邊涿州刺史史萬山城守郭威

遣索萬進率騎七百屯深州一日契丹數千騎迫州東門萬山父子率兵百餘人襲之契丹僞退十餘里而伏兵發萬山血戰急請救于萬進萬進勒兵不出萬山死之契丹亦解去時論以罪萬進三年四月贈萬山太傅其冬契丹主自將南伐陷饒陽安平等城大獲而還李太后敕郭威擊之行至澶州兵變遂易漢爲周周太祖廣順二年爲遼穆宗應歷二年遼將高模翰率二千騎以葦棧度胡盧河擾深冀欽州刺史何繼筠與虎捷都指揮使劉誠誨率兵拒之至武彊獲老稚千人模翰遁去周世宗旣立雄攬北邊中國之執一振使龍捷左軍都虞候杜漢徽屯軍安平

記五

兵事

三

破契丹於縣南獲器用車帳顯德二年命韓通王彥超浚胡盧河遂城李晏口爲靜安軍四旬而就先是深冀界上有胡盧河橫亘數百里隄塌陵夷不足限戎馬敵騎涉河馳突洞無阻礙世宗詢張藏英以備邊之策藏英請于深州李晏口置砦誘境上亾命隸軍願爲主將得便宜討擊帝乃按圖定策命韓通王彥超浚河築城而張暉護其役功未就契丹兵至韓通迎擊卻之城成以爲靜安軍以藏英爲緣邊招收都指揮使賜名馬金帶藏英累月募得勁兵千人會王彥超巡邊爲契丹所圍藏英率新募兵馳擊契丹解去韓通等旣築靜安軍又城安平武彊等城往來

督護夜宿古寺晝披荆棘在安平領百餘騎督役契丹騎數百奄至通率麾下與戰日暮大風雨契丹解去擒十餘騎諸城皆得形勝李晏口尤扼要害南距冀州百里北距深州三十里夾胡盧河爲壘自是敵騎雖至不敢涉河邊民稍得耕牧顯德五年遼穆宗應麻之八年也周師侵遼圍馮母廟執張甚張思溫請益兵穆宗報曰敵來則與統軍併兵拒之敵去則務農作勿勞士馬會周兵入東城遼軍退渡滹沱而屯周兵引退思溫亦還宋興太祖尤重開邊釁慎用兵開寶二年詔深冀等五州管內鎮砦縣悉城之又詔相深趙三州丁夫征北漢時死太原城下者復其

記五

兵事

三

家自周世宗克復瓦橋關南置雄霸等州是後深州不被邊開寶八年與遼通好自是北邊少事太宗構釁契丹雍熙三年契丹南伐拔深州以不即降誅守將以下縱兵大掠破武彊殺供奉官武彊都監孫公孫妻江南國主李景女也納土後嫁孫及遼聖宗破武彊獲之歸封芳儀生公主一人晁无咎顏復爲作芳儀曲者也雍熙四年聖宗統和之五年遼人南伐十二月遼遣北府宰相蕭繼遠往覘安平端拱二年宋馬知節知深州是時深州新蹂于契丹城郭廬舍多壞而流民累知節至數月則壞者完流者復舉州忘其寇戎之故以知節爲能撫我淳化三年李繼宣

徙定州行營都監戍涿州五年以尹繼倫爲涿州團練使
領本州駐泊兵馬都署眞宗咸平二年契丹南伐帝親禦
之大名三年以楊嗣爲涿州團練都巡檢使是時命孫全
照度地河北上言沿河高阜可分置城堡屯戍者凡二處
其一爲武彊縣側上重于興役祇命營安平南徙置祁州
云自宋興以來中外少事涿州不大被兵然時有小警仁
宗時龍圖閣直學士包拯爲河北都轉運使請罷河北屯
兵分之河南其稱涿州馬軍雲翼兩指揮兵士九百七十
九人馬四百十四匹那移有糧草州軍就食約減省糧八
百八十一石草十一萬九千三百三十二束料萬一千九

記五

兵事

三

百二十三石二斗上寢不報契丹旣衰金元繼循故迹至
明興而涿州始無敵國侵伐之患當宋徽欽之世金人熾
盛宣和三年議復燕山諸軍至邊皆潰劉延慶蘇格等五
十騎抵滹沱河遇金兵二千餘騎格等失措韓世忠從容
令格等屯高岡勿動自躍馬薄敵突二執旗者金軍大亂
格等奮擊之追斬甚眾靖康元年遣使如兩河割地以子
金歐陽珣上言祖宗之地尺寸不可與人又言戰敗而失
地他日取之直不戰而割地他日取之曲時宰怒之乃以
珣爲將作監丞奉使割涿州珣至涿州城下慟哭謂城上
人曰姦人誤國至此吾已辦一死來矣公等勉爲忠義幸

堅守勿懈金人怒焚殺之當是時國威已不能遠被割地
紆禍雖下策執故不得已珣不參彼已區區以一死爲忠
於國何補然涿州人哀其遺骨立塚祠之至今不絕也金
海陵王正隆元年宋高宗之紹興二十六年也金以翰林
直學士施宜生知涿州正隆四年宜生爲宋國正旦使宜
生邵武人得罪北走恥還見宋人力辭不獲命既至宋命
張燾館之都亭風以首邱宜生爲廋語曰北風方勁又扣
几取筆曰筆來筆來於是宋人警備金人聞之烹宜生金
宣宗貞祐元年宋寧宗嘉定六年也蒙古圍金燕京蒙古
青吉斯汗舊作成吉思可汗特穆津者元太祖也稱帝八年矣自將

記五

兵事

三

取金雄霸涿冀等州凡破金九十餘郡是時金祁州刺史
賈輔以衆歸太祖攻安平等縣下之貞祐二年金以沈思
忠同知涿州軍州事思忠招集蕩析百姓得五萬餘人可
充軍者萬五千人諸軍皆願得思忠爲帥貞祐三年蒙古
兵入燕其九月周元兒陷涿祁州東鹿安平等縣所謂紅
襖賊也其渠帥郝定僭号山東真定帥府以計破斬元兒
殺其黨五百餘人貞祐四年閏七月復涿州而郝定亦爲
侯摯所破殺是時金兵不能敵蒙古然平定土賊力尙有
餘金宣宗興定元年宋嘉定十年也蒙古太師穆呼哩舊作宋華黎
經畧山南二年蒙古所畧趙州太守王義進攻涿州守帥

以城降是時張柔降蒙古爲順天都元帥柔上義功升義爲深州節度使深冀趙三州招撫使三年張柔率兵南下次滿城金同知真定府事武仙會鎮定深冀兵數萬攻之敗退柔遂進攻安平等縣克之由是深冀以北鎮定以東三十餘城望風降附柔之威名振于河朔王義進拔冀州柔復上義功授龍虎衛上將軍武安軍節度使行深冀二州元帥府事義布教令招集散亡勸率種莖深冀之間遂爲樂土興定四年金以河朔州郡殘毀募土人威望服衆者假以方面重權乃封九人爲郡公皆兼宣撫使摠帥本路兵馬署置官吏徵斂賦稅賞罰号令便宜行事自畫定

記五

兵事

五

所管州縣外能收復鄰近州縣亦聽管屬於是深州及三縣皆隸河閒招撫使伊喇重嘉努

舊作移刺
衆家奴

爲河閒公然是

時州境已入蒙古金蓋不能有也自五代以來深州時苦邊患及元世定都順天而州爲郊畿甸服繇是久不被兵

太宗時定諸王食采分地五戶出絲一觔謂之五戶絲太

祖次子察罕台

舊作茶
合解

分食太原四萬餘戶太宗十年加食

深州一萬戶順帝至正二十八年明師入大都徐達陳兵齊化門將士昇中書參知政事郭庸至齊化門衆叱之拜庸曰臣各爲其主死自吾分何拜爲不屈而死庸字允中蒙古氏其墓在深州清輝圖村碑云元故丞相郭公允中

之墓其後裔皆居清輝圖云徐達入元都常遇春別下保定河間真定諸郡縣深州諸縣蓋皆常兵所下也明代屢更兵革畧如漢時自徐常平定畿輔之後建文元年燕王棣舉兵南犯而有藩鎮之禍是時大將軍耿炳文率師北伐都指揮平保屯營武彊縣東拒戰敗沒後人名其村爲平都村二年盛庸敗燕兵于東昌檄真定諸將屯威縣深州邀燕歸路三年正月吳傑平安邀擊燕兵于深州燕將薛祿擊走傑安燕王乃得還北平三月燕兵復出盛庸與戰于武邑之夾河傑安自真定引兵來會列陳滹沱河南棣率驍騎循河繞出陳後安于陳中縛木爲樓高數丈戰

記五

兵事

五

酣輒登樓發強弩射燕軍死者甚衆矢集燕王旗如蝟燕王遣人送旗北平諭世子高熾謹藏以示後世燕王每戰親陷陳所向皆靡惟盛庸平安屢挫之會大風發屋拔樹都指揮鄧戩陳鵬等陷敵中安敗走真定燕兵遂南天下既定遷都北京是後逮國朝五百餘年深州長隸畿輔無藩鎮之憂而鄰敵外鬩盜賊內訌猶時時有之正統十四年土木之敗衛拉特額森舊作也先以英宗北去其冬奉英宗入攻京師于謙督諸軍擊郤之而請益兵守真保涿易諸府州以防寇南侵是時州屬真定蓋嘗戒嚴矣此外國侵軼之禍也初宋仁宗慶曆七年王則反貝州而深州卒龐

且與其徒謀以元日殺軍校刦庫兵應之知州王鼎知之
夜檄軍校攝事外邑而陰爲備明旦會僚吏置酒叛黨愕
不敢動鼎捕首謀十八人送獄軍中謀刦囚鼎命取囚斬
其桀魁數人一郡帖然是時州尙在邊非畿內自是厯金
元迄明初州無草竊爲亂者及武宗之世而有劉寵劉宸
之亂寵宸文安人世所謂劉六劉七者也正德六年攻溪
州知州李鴻力守不能破去陷饒陽殺都指揮杜輝是時
巡撫甯杲軍無紀律号于軍曰得首一級賞一銀牌於是
軍人多殺過客居民以邀賞有武彊民梁氏兄弟三人方
治田皆被邀賞者斬其首以去世宗嘉靖三十三年武彊

記五

兵事

五

民高雄張任等作亂典史王齋集鄉兵擒斬盜魁二百人
餘黨悉平四十四年安平妖人馬相與妻孫氏以白蓮教
煽惑鄉民遂及其黨李學詩等謀作亂約期舉事會天雨
未集有張平者被酒謾罵賊手刃之因縱火焚劫村落安
平典史陳萬卷領鄉兵捕斬之餘黨悉平凡此皆盜賊竊
發賴良有司防禦綏輯以免禍者也高雄馬相亂未發而
滅惟劉寵宸爲甚及李自成起而流寇之禍極矣明社既
屋盜黨亦平明非獨流寇劇也太祖初興徐常畧地燕趙
頗類漢高光時靖難兵起視唐藩鎮之變殆又過之土木
之難州尙無大警及季世 大清兵再至兵威遠邁金元

石趙慕容燕苻秦之爭據一方者不足言矣綜明一代州境被禍實兼前世兵端而備有焉崇禎十一年大清兵入塞攻下畿輔四十八城十一月下涿州知州孫士美自縊于無婁亭亭在州城上士美青浦人也同殉者州判劉沛然吏目朱春芳學官任尹劉名言及士人呂叔成等大清兵圍安平知縣孔聞俊嬰城拒守身被流矢巡城不懈堅持兩晝夜大清兵解去城以不陷閱五月聞俊竟以流矢創發而卒其時守城戰沒者有士民高有聲等二十八人崇禎十五年大清兵克薊州分道南嚮河間以南多失守時武彊盜賊嘯聚真定府通判顏公臨縣按視

記五

兵事

三

保甲法下令各村自禽治境內悉平十六年大清兵自山東還至近畿再圍涿州知州李燭吏目熊國俊分城而守城破李燭殉死國俊亦拔佩刀自裁崇禎十七年我世祖章皇帝之順治元年也二月李自成陷太原遣別將犯畿南檄真定總督徐標降標斬其使裨將李茂春等殺徐標迎降於是自成遣偽官樊景星至安平招土賊康文斗入城據之三月文斗等進攻饒陽焚劫三門偽裨將薛教民引眾數千至城西邑人田敬宗分守西門擊卻之賊至南城又拒之已而偽縣令至知縣王國梁棄城逃賊據饒陽四十日大清定鼎李自成西奔河北郡縣相繼歸

命饒陽人故明尙書田唯嘉縛僞令肆于市眾推田敬宗
爲盟主敬宗唯嘉子也康文斗環攻不拔其豪酋武彊人
郭壯畿飛矢射書入城使獻敬宗城守愈力相持七日賊
稍引去聚眾羅官屯是時安平僞令已潛遁矣安平大姓
呂氏以賊殺諸生呂光陽怨之時 大清兵在定州呂氏
往請兵兵奄至殲賊首李開早郭壯畿等而禽康文斗至
饒陽寸磔之人爭食其肉須臾盡是時大兵經營四方草
創天下羣盜餘黨嘯聚郊坰譬猶洪爐燎毛有不俱靡者
哉 聖清有天下二百餘年海寓艾安蕃國面內民生不
見兵革京畿州郡近依日月沐浴大化和樂數世視他行

記五

兵事

三

省爲尤物盛而衰崇極易圯陵遲至咸豐初載粵西萌孽
流毒江南分遣悍黨乘閒北窺三年九月賊將林鳳翔李
開方吉文元等破臨洺關由趙州藁城晉州折而東趨是
月己酉時加未至深州是時倉卒無備城遂陷知州陳希
敬州判顏錫敏死之先是正定人王蔭普都講深州聞警
將歸戊申

是月六日也平定粵匪方畧載勝保奏初八日陷深州晉州被陷亦報
在初八日其爲賊分黨無疑據王蔭普記陳希敬死事文則藁城初六

陷深州
初七陷

至藁城遇賊而旋已酉平明還深州希敬迎至州廨
并召錫敏至籌守禦希敬曰城無斗糧寸械無徒苦吾民
爲也吾身當與此城俱靡耳因自入卧內埋印敕散妻孥
復出問錫敏計錫敏曰願從公死守希敬喜麾蔭普去曰

君在賓師無徒俱死也命陳鹵簿朝服坐堂皇待賊賊至
遇錫敏于儀門殺之被百刃以死遂入希敬叱賊曰咄若
亦民也何苦爲逆能釋兵者免死賊怒斫希敬傷額仆地
賊渠後至欲降之麾衆退縛希敬庭樹上窘辱百端至夜
賊衆倦卧有州民同縛者脫其縛要與俱去希敬曰吾尙
有事若姑去因舉火欲燒州廨賊驚覺再縛希敬希敬大
罵賊攢刃刺其腹洞中瞪目不能言其酋命舁至廨舍旁
積水中以死自賊中逃歸者述其狀如此後冀州知州葛
之榮獲賊將問希敬死事亦云事聞得 旨加道銜贈卹
立專祠死所當是時 天子命科爾沁親王僧格林沁

記五

兵事

无

統京兵進駐保定 欽差大臣勝保專力進攻僧格林沁
請駐涿州勝保追賊急馳至保定聞涿州陷由張登安平
進擊癸丑都統西凌阿自束鹿至涿州遇賊于城西十里
之杜莊敗還東鹿都統三祿自深澤繼至乙卯勝保至州
北屯于王村名其村曰得勝營丙辰賊出城迎擊官軍勝
保與西凌阿三祿三道并進敗之遂進屯州北十五里之
西午村己未賊夜襲我軍勝保令馬步分道設伏自出指
麾副都統佟鑑督礮隊轟擊賊始披靡辛酉勝保分道進
攻追至城下賊敗退入城守我軍進薄東門日暮收衆將
還賊自南門潛出繞至東關橫擊我軍都統三福統吉林

馬隊力戰驂挂于木陣亡官軍遂敗死者千餘人壬戌夜
暴風賊乘間席卷東窺由武彊之小範濟淦焚橋遂陷獻
縣其後久之乃聚殲于臨清馮官屯也初賊踞涇州將東
窺饒陽知縣秦聚奎練勇一萬四千人置備器械分隊防
守禽獲賊謀輒殺之賊不敢犯 文宗聞而嘉之命直隸
總督桂良查奏獎勵於是聚奎加四品銜以直隸州知州
升用署典史袁文潮教諭張惠立訓導李文炳及團練士
民各進秩有差事載方畧蓋異數也初賊據州城未嘗劫
畧辛酉賊謀他遯乃出百餘騎劫村落至州東南景萌村
村人郭洛慶率眾拒賊賊不能近壬戌賊復至眾力不支

記五

兵事

三

退守塹中賊攻入村洛慶巷戰以死村眾死者百餘人州
人至今矜之粵苗既去其後十有六年而州境復有捻匪
之禍捻匪者起豫皖閒蔓延河南淮北各行省十餘年未
嘗擾及河北也同治六年其渠張總愚等始北渡自秦晉
犯畿輔七年正月丁卯十六日由祁州窺安平饒陽所至焚畧
游騎扣饒陽城索銀馬守者以好言卻之遂不設備戊辰
時加申賊眾乘城城陷教諭常純具衣冠罵賊死子房山
縣學生履剛從被害是時諸帥勤王天下勁兵並集畿內
庚午齊軍王心安湘軍劉松山皖軍郭寶昌皆至饒陽諸
將分稟帥命不相策應辛未劉松山郭寶昌凌晨會兵擊

城北張岡屯賊敗之王心安自尹村攻城賊弃城先遯心安追至菜園賊更結陳死鬥心安兵大敗參將金成德守備劉家興戰死賊執益張壬申饒陽鄉團十餘村拒賊死者千餘人其夜王心安復合兵襲賊賊竄入潞州武彊境癸酉淮軍潘鼎新至饒陽與皖軍會進是日賊自潞州夾城而西竄東鹿潞澤等縣甲戌劉松山等追入潞州賊已北竄高陽矣二月辛巳是日夜大雪賊復竄安平饒陽北連博野蠡癸未竄潞州南乙酉竄東鹿晉州衡水等縣丙戌竄潞州西南之王家井丁亥復至州南留二日己丑劉松山郭寶昌與豫軍宋慶張曜齊軍莫組紳等追賊至州東

記五

兵事

三

南三十里之五龍堂大敗之追奔二十餘里至東陽臺收隊禽斬數百名奪獲馬贏器械無算庚寅諸將復分道追擊賊竄祁州甲午淮軍郭松林楊鼎勛至安平擊賊乙未夜賊乘霧竄饒陽東丙申至其縣北張曜宋慶躡擊賊竄獻縣丁酉賊竄饒陽潞州界上留楚鎮大馮營等村劉松山郭松林等追擊賊竄晉州庚子折而東竄至武彊之小範辛丑由饒陽徑竄肅甯張曜宋慶急馳百餘里繞出賊前與劉松山郭寶昌等約定夜襲焚賊所據村大敗之斃其豪酋張五孩賊氣奪張總愚率黨西遯祁州潞澤賊自是勢漸不支壬寅陝甘總督左公宗棠自率軍追賊至安

平北癸卯賊自祁州深澤偷渡滹沱南去自正月丁卯至
二月癸卯賊往來州境凡三十七日男婦死者萬餘人是
年今大學士直隸總督合肥李公遂殲賊徒駭河道誅悍
賊卒就夷滅嗚乎非 天子威靈將帥勦力曷由蕝此元
功哉自是以來海內清平萬國結約通使互市并集畿甸
君相焦勞以懷濡方外爲事亦頗購備遠鄰船械用戒
不虞而士夫時有異論政府稍稍兼採至光緒廿有六年
畿輔亂民麻起當國者眩于圖議遠近鄰敵聯兵內犯
京師不守 兩宮蒙塵賴議和大臣彌縫百端構衅諸要
人以次論罪而後京師復 乘輿還此經所謂不遠復无

記五

兵事

三

祇悔者也安危之機夫豈不以謀哉先是明之季世西方
天主之教始入中國我 聖祖皇帝兼綜西學有 旨允
其傳授其後稍益禁絕而民間私傳不止咸同之世與外
國約好遂弛其禁自是民教不和訟端繁滋 朝廷恐失
邦交時誠有司調護西教未大生事及此年倡亂之徒以
仇西教爲名假白蓮教遺術稱有神助設壇傳習名爲義
和拳用乾坤坎離諸卦分立旂幟所在聚黨橫恣千百爲
羣旬日間聲執猖獗內動公卿外劫疆吏而中外之釁成
矣當是時州境不逞之民紛紛競起與鄰州縣相應和所
至焚殺攘敗西教師徒死徙流散不敢與校上下奉爲義

民官不能制或從而嘿助之外國兵旣入 京師分據保定戕大吏西侵正定東畧至於河獻亂黨繇是潛解保定正定河獻諸郡邑外兵所過多受禍而州境以不當孔道僻遠官亦竭盡智慮收卹西教流徙諸民官吏私語竊幸以爲媮免外侮矣已而敵軍忽出保定聲言州官嘗助亂黨將至州而甘心焉卒賴收卹教徒盡心力教徒中有俠者夜入敵軍爲游說軍已臨境矣竟不入復引去州卒無事自北魏大乘賊合狂藥起事至明世妖人馬相用白蓮教術稱亂皆始起遽滅其餘盜賊初發皆借異術爲名從未有似今茲亂民用怪妄邪說使在廷百執羣焉惑溺而

記五

兵事

三

不寤麻代兵禍多端及我 朝咸同以來粵盜捻莩用兵至罷敝矣而其禍之捷發亦未有動五洲之兵起訖數旬遂至震驚 宮廟如今者也傳曰殷憂啓聖吾 國家自今其變動光明振拔而日新矣乎而一州數百里間遭古今未有之奇變竟獲安居作業逃于外至之憂虞亦云幸矣禍福之機間不容翮忽謀之臧否可勿慎諸謹記漢晉以來迄唐宋金元明入 國朝州所麻兵革而終之以今茲畿輔亂民事始末俾來世治國聞者有考焉